

【線上學習】李秉璋原作

神奇、神奇、真神奇，上課毋使鬥緊，交通毋會塞，想愛學麼个，就學麼个。先生在徭擇，時間在徭選，三更半夜也做得，先生講到生趣又分明。佢做得係學生仔个先生，也做得做先生个先生，總講佢桃李滿天下，毋使準備拜師禮，毋使納學費，你想愛學，佢就會教。

毋管你係即靈抑係惹霸，佢都收。佢無擇學生仔、無擇時間、無擇所在，單單擇你，擇你想愛學个心。這條學習个革命，這條時代个轉變。來了急、來了遠，跔得著大進步，就像係脣頭有仙人指點，武功大進。

馬桶毋曉整有人教，鏈鋸毋曉使，一步一步來，倒訣¹分你知。網路線个接頭線路毋曉排，有人教你色地愛分明，五花十色照順序，工具合特別，頭尾一下同佢夾落去，接頭插落網路通。

雖然講一個銀角仔毋會響，毋過先生大部分都係自家在該唱戲，講到口涎波潑，精神飽滿，歡頭喜面，若人个都毋會療又合有耐心！一遍教毋會，過教一遍，你想愛學幾多擺就學幾多擺，

學到你自家無愛。

千里緣分一線牽，天下盡在徭彈指間。現代生活真鬆爽，冷氣吹，彈指間，毋使出門、毋使尖車，想愛仰仔學就仰仔學。就算係疫情時節，學校个線上教學，有一息仔無恁自由，毋過也有人當認真，煞猛聽課，煞猛查資料，正經係一踢三通，師傅渡入門，修行在個人。上課講義自家留，毋使抄，三個快速鍵一掀，滑鼠一箍，講義就留下來。

上課當日先生有錄影：驚你單單係「用手機仔上課定定」，人毋知走哪位去。故所，先生上課會問問題，一半問，一半係在該點名，看你心思有在無？認真上課个，回答無問題、講頭就知尾，無用心个也無問題，平平無問題，這個係毋知半項，故所「無問題」。連先生喊佢回答，佢也像係人間消失，無鏡頭、也無應聲，訊息欄項也無留字，故所佢正經係「用手機仔上課定定」。

線上學習，成就隨在人，逐儕有擇个自由，就愛對自家个人生負責。對自家未來正經个慷慨，就係同一切都貢獻分現時。今晡日个徭，成就天光日个徭。

¹ 倒訣：音 do` gied`；傾囊相授。

【火燒叨崗¹】李宜諭原作

在鄉下，鬧鬧熱熱个舊曆年一過呵忒，又伸著恬靜个生活。毋過，行過消防隊時，會看著該一臺一臺个消防車駛出車庫停在路肩，雖然看毋著無閒泊杈个身影，乜聽毋著緊張刺耳个警報聲，毋過，空氣裡背因等息把仔愛停動个電波，一種神經掛經个氣氛。

舊曆二月係美濃人掛紙个時節，恁多年天時改常²，春雨慢到，二月个叨崗濕絲絲仔，故所，第一個拜六掛紙个臨暗開始，就會看著叨崗項出現沖天个煙，接下來紅紅个火光就透出來乜：阿姆哀唷，火燒叨崗哩！消防車个身影像走相逐樣仔春一路出，警報聲在街路項颼等過³，一臺、兩臺、三臺……總概都出動哩，毋過，斷烏過後就難耐乜，高不將換手腳流掠个阿兵哥，拿等鏟仔、刀嫌同附近个竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機个聲就在天頂來來去去響無停。「直升機去美濃湖畱水哩哟！」美濃湖

黏時鬧熱起來，大家煞煞號隻好位仔，坐下來定定仔看等直升機在湖面畱水个景象。遠遠飛過來个直升機，會到美濃湖个時節，就會定定仔降下來，等到肚屎下背个大袋仔揸著水面，但就會遽遽同袋仔向前拖一下再擲起來，淦淦一大袋个水就吊起來乜，績等就同這恁大袋个水晃晃激激⁴吊到廣善堂背个叨崗項，對半天高倒啊下。恁大袋个水，隨化做一陣白白个濛煙散淨淨。

天頂个直升機一轉又一轉、對打早飛到斷烏；山腳下消防車个水一管又一管緊洩；叨崗該紅紅个火跡對山前遭到山背、對山坪遭到山頂。恬靜个暗夜，總會聽著竹頭燒到劈里啪啦⁵響个聲，火屎就跔等風一哪仔飛，等到天光該下，人家个屋頂、大路項、田坵肚跌到全全係烏烏个火燐煤。叨崗个火日夜燒等，山下个消防車、救護車、阿兵哥乜日夜掌等……。下把仔，伸著沖天个白煙，大家想愛轉擺⁶一下个時節，紅紅个火尾又好恬恬个蹺啊出⁷，就恁仔一直愛燒到掛紙結束。

火燒叨崗對環境、對山林个破壞十分大，看著劈竹頭个阿兵哥分樹杈仔剛⁸到手同面都血流血著，實在分人已毋盼得！掛紙个方式，係毋係需要鄉親好好來思考、參詳呢？

¹ 叨崗：音 in gong^ˊ；小山崗。

² 改常：音 goi^ˋ song^ˋ；反常。

³ 颼等過：音 xiu den^ˋ go；行動迅速如風而過。

⁴ 晃晃激激：音 gong^ˋ gong^ˋ gieb gieb；因搖晃使得水從容器中溢出來。

⁵ 劈里啪啦：音 pi li pa la；擬聲詞。形容爆裂、拍打等的連續聲音。

⁶ 轉擺：音 zon^ˋ bai^ˋ；休息。

⁷ 蹺啊出：音 liung^ˊ a cud^ˋ；蹺出來。

⁸ 剛：音 gua^ˋ；被尖銳的東西割破。

【鵲婆飛啊飛】張瑞玲 原作

打早，日頭正對東片鵲婆背¹个後背跪起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到叻，算當早咧！無胚著，正踏入園肚，隔壁種大梨个阿權哥就在該大聲喊咧：「愛！日頭恁高咧正到叻，敢做有事？」

唉！佢都恁早咧，還輸佢，這阿權哥係歸暗暗毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鵲婆得叻啦！」

吾个山園在山龍園等个窩墘肚，若係堵著像今晡日恁樣个好天時，打早就會有三、四隻大鵲婆，在四圍个山嶺頂飛啊飛欸。

同阿權哥个嘴鼓都還古搭煞，聽著遠遠个所在傳來「咻！咻！」个聲，鵲婆出來叻！阿權哥看著鵲婆出來，做等个山事也無心做咧，跔等一陣來搽接梨仔个工人，坐在吾工寮个蔭影²下欣賞這齣大自然个表演。

看佢兜閑閑長个翼胛、跔等氣流，慢慢仔迂、定定仔盤，

越迂越高、緊盤緊遠，到尾變做天邊个一粒烏點，就像係優雅个天頂王者，對天頂看等佢守護个土地。

成半下，還會看著佢兜胸挺挺、目叮叮仔停在脣頂个樹桮頂高，好恬恬無聲無說就從往下³，一睜目又轉身飛往上，該尖尖利利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚叻。

又成時，看佢兜在高高个天頂盤來飛去，忽然間，厥兩片翼胛一收，對天頂直直蹣⁴往下，吾心肝肚還想等：「這隻鵲婆，這下穩死無命哩！」毋過，看佢硬硬都會撞著地泥叻，厥翼胛一闊、利爪一伸，一睜目時間，該利爪項，毋知哪時又抓著一隻圓身還在該扭啊扭个大老鼠叻。佢一轉身，又飛到半天高咧！

歸陣人看鵲婆表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鵲婆守護這搭土地，戴在這四角圍个老嫩大細正好安生生活啊！」

¹ 鵲婆背：音 ieu poˋ zuìˋ；東勢東方山峰名，華語稱高背山。

² 蔭影：音 im iangˋ；陰影。

³ 從往下：音 jiongˋ gongˋ haˋ；往下俯衝。

⁴ 蹣：音 zud；觸擊、銜拉。